

BOSNA I HERCEGOVINA
FEDERACIJA BOSNE I HERCEGOVINE
ZENIČKO–DOBOJSKI KANTON
KANTONALNO TUŽILAŠTVO
ZENIČKO–DOBOJSKOG KANTONA
Broj: T04 0 KT 0044273 21
Zenica, 02.07.2021. godine

KANTONALNI SUD U ZENICI
- Sudiji za prethodno saslušanje -
Z E N I C A

Na osnovu odredbe člana 45. stav 2. tačka i) i odredaba člana 241. stav 1. Zakona o krivičnom postupku Federacije Bosne i Hercegovine, podižem

O P T U Ž N I C U

Protiv:

CANER TAYLAN, rođen u mjestu Adana, Republika Turska, nastanjen u Zenici, po izjavi neosuđivan, nalazi se u pritvoru

što je,

Dana 13.01.2021. godine, u Zenici, oko 09,00 sati, u namjeri da razmjeni veću količinu novca, stupio u kontakt sa oštećenim R. O., koji se bavio nelegalnom razmjenom deviza, sa kojim je prethodno dogovorio razmjenu novca, nakon čega je po unaprijed pripremljenom planu pripremio hladno oružje-nož s pvc drškom oker-bijele boje, ukupne dužine 32,5 cm, dužine sječiva 20 cm i oznakom na sječivu „Hohe Qualitat Kuche Messer“, koji je istog dana ponio sa sobom i stavio ga u najlonsku vrećicu pored ručice mjenjača u vozilo kombi marke „VW“ bijele boje, registarskih oznaka, registrirano na firmu „F.“ d.o.o. Zenica, te mobitelom dogovorio sastanak sa R. O. u ulici Safvet bega Bašagića u neposrednoj blizini zgrade Elektrodistribucija Zenica, gdje su na pomenuti lokalitet oko 09,30 sati zajedno došli oštećeni R. O. i oštećeni A. M., ušli u vozilo kombi, te zajedno, ulicom Safvet bega Bašagića i obalnim bulevarom krenuli prema neuređenom parking prostoru u ulici Nikole Tesle, u neposrednoj blizini benzinske pumpe „T-oil“ i hotela „Biss Tours“, gdje zaustavlja vozilo, uzima unaprijed pripremljeni gore opisani nož, pa sa namjerom da oštećene liši života iz koristoljublja, a kako bi im oduzeo novac za koji je znao da ga oštećeni nose sa sobom, svjestan da zadajući ubode nožem u vitalne dijelove tijela oštećenih iste može lišiti života, što je i htio, najprije A. M. koji je sjedio na prednjem sjedištu u sredini vozila zadaje jedan ubod oštricom sječiva noža u predjelu prednje strane grudnog koša lijevo na oko 5 cm iznad i udesno od lijeve dojke bradavice i na oko 8 cm od središnje crte, te na oko 141 cm iznad donjeg ruba stopala probijajući prednju stranu srčane kese, te potom stjenku desne srčane komore završavajući se u njenom zjapu sa nastalim obimnim izlivom krvi u lijevu grudnu duplju, kao i u srčanu kesu, zatim jednu ubodnu-reznu ranu središnjeg dijela desne šake dužine oko 4 cm i dvije poprečno postavljene međusobno paralelne plitke rezne rane dužine oko 1 cm, koje ozljede su neposredno uticale na smrtni ishod oštećenog A.M., čija smrt je nastala nakon kraćeg vremena i koja se nalazi u direktnoj uzročno-posljedičnoj vezi sa povređivanjem prednje strane grudnog koša A. M., a nakon toga R.O. koji je sjedio na sjedištu uz desna vrata kombija najprije zadaje oštricom sječiva jedan ubod u predjelu lijeve bočne strane vrata u nivou grkljana strane vrata, načinivši otvor u koži

dubine oko 4,5 cm, koji se nastavlja kroz meka tkiva vrata presjecajući gornji dio lijeve karitoidne arterije, poslije čega izlazi iz vozila, dolazi do suvozačevih vrata, gdje se nalazio R. O., koji u tom trenutku pokušava izaći iz vozila, te mu zadaje još tri uboda nožem u predjelu lijeve bočne strane vrata nanoseći mu ubodne rane dužine otvora od 2,2 cm, 3,8 cm i 1,2 cm, a nakon toga i udarcima nožem jednu ubodnu ranu desne bočne strane vrata, kao i dvije rezne rane desnog tjemenog predjela glave, nakon čega je oštećeni R.O.uspio izaći iz vozila, pada u neposrednoj blizini vozila na zemljanu površinu, a Caner Taylan je nakon njegovog pada zadao još jedan udarac nožem nanijevši mu ubodno reznu ranu u lijevom dosredišnjem dijelu trbušne stijenke, nakon čega je nastupila nasilna smrt oštećenog R. O. koja je nastala usljed vanjskog iskrvavljenja, a koje se nalazi u uzročno-posljedičnoj vezi sa povređivanjem lijeve strane vrata oštećenog R. O., da bi potom presjekao kaiš crne torbice koju je oštećeni R. nosio na ramenu, u kojoj se nalazio novac u iznosu od oko 3.350,00 KM i koji je Caner Taylan oduzeo, a nakon toga se okrenuo prema vozilu sa namjerom da i od oštećenog A. M. oduzme novac koji je ovaj imao kod sebe u torbici, istog ne zatekavši u unutrašnjosti kombija, jer je oštećeni A. M. u međuvremenu, teško ranjen, izašao iz kombija, uputio se prema ulici Velikog sudije Građeše, gdje se sakrio u dvorištu kuće vlasnika K. Č. i tu preminuo, te je potom stavio vozilo kombi u pogon, noseći sa sobom sredstvo izvršenja krivičnih djela-nož, kao i prisvojeni novac R. O., pa se onda odvezao ulicom Nikole Tesla u pravcu glavne gradske magistrale i dalje pravcem prema naselju Blatuša, a zatim magistralnim putem M-17 u pravcu Lašve i dalje prema Busovači, gdje ostavlja vozilo na lokalitetu Grablje, općina Busovača i udaljava se u nepoznatom pravcu, da bi dana 14.01.2021. godine od strane ovlaštenih službenih osoba Srednje-bosanskog kantona bio pronađen i lišen slobode na lokaciji Raško Polje-Rasno, općina Busovača, te predat ovlaštenim službenim osobama MUP-a ZDK na dalje postupanje,

dakle, usmrtio dvije osobe iz koristoljublja,

čime je počinio dva krivična djela Ubistvo iz člana 166. stav 2. tačka d) KZ F BiH u vezi sa članom 54. istog zakona.

PRIJEDLOG ZA PRODUŽENJE PRITVORA NAKON POTVRĐIVANJA OPTUŽNICE

Na temelju člana 151. ZKP F BiH predlažem da se prema osumnjičenom Caner Taylan i nakon potvrđivanja optužnice produži pritvor, a iz razloga propisanih u članu 146. stav 1. tačka a) i d) ZKP F BiH, zbog kojih razloga mu je i ranije određen pritvor rješenjem tog suda broj: 04 0 K 012484 21 Kpp 8 od 16.01.2021. godine i produžen rješenjima istog suda broj: 04 0 K 012484 21 Kv od 10.02.2021. godine i broj: 04 0 K 012484 21 Kv 2 od 12.04.2021. godine, koji može trajati do 14.07.2021. godine.